

授堂金石文字續跋

授堂金石文字續跋卷十

偃師武億虛谷著

男穆淳編

孫承重校刊

宋興州新開白水路記

正書嘉祐二年
二月在畧陽

記文撰書及篆額皆雷簡夫一人簡夫自列銜宣德郎守
殿中丞知雅州軍州兼管內橋道勸農事管勾駐泊及提
舉黎州兵甲巡檢賊盜公事騎都尉借緋宋史職官志崇
寧中復置提舉兵馬提轄兵甲皆守臣兼之此題稱提舉
黎州兵甲蓋舊有此制既罷而至崇寧始復之簡夫本傳
用張方平薦知雅州與此題合而文載開路始末與督作
按視之人有知興州事虞部員外郎劉拱簽署興州判官
廳公事太子中舍李良祐權知長舉縣事順政縣令商應

知鳳州河池縣事殿中丞王令圖令圖見長子縣法興寺
記後列前利州路諸州水陸計度轉運使兼本路勸農使
朝奉郎守尙書主客郎中兼上輕車都尉賜紫金魚袋李
虞卿利州路諸州水陸計度轉運使兼本路勸農使朝奉
郎守尙書工部郎中充集賢校理輕車都尉賜緋魚袋
紫田諒蓋以斯役實肇于李而遂成于田也虞卿見梁適
傳茶賈負公錢四十萬緡鹽鐵判官李虞卿案之急賈懼
與吏爲市內交於適子弟適出虞卿提點陝西刑獄及罷
帝卽還虞卿三司又見丁度傳通判吉州李虞卿受財免
貼納事覺諒見朝城縣孔子廟記

造萬安橋記

嘉祐五年

記爲蔡襄撰并正書字徑五寸餘文云泉州萬安渡石橋始造于皇祐五年四月庚寅以嘉祐四年十二月辛未訖功系趾于淵釐水爲四十七道梁空以行其長三千六百尺廣丈有五尺翼以扶欄如其長之數而兩之靡金錢一千四百萬求諸施者明年秋蒙召還京道緣是出因紀所作勒于岸左宋史列傳襄以樞密直學士再知福州徙知泉州距州二十五里萬安渡絕海而濟往來畏其險襄立石爲梁其長三百六十丈種蠟于礎以爲固又植松七百里以底道路閩人刻碑記德召爲翰林學士三司使與此記合傳于召爲學士未實其年歲証之記文是爲嘉祐五年秋也

王世安北嶽題名

右題名正書另界畫一方其文云大宋嘉祐五年庚子歲冬十一月奉勅就差知定州曲陽縣事兼管勾北嶽廟明年夏四月二十七日到任至治平元年春二月初一日滿替赴闕謁謝聖帝祠下西頭供奉官王世安謹記宋舊制嶽瀆各廟之政令多統於本縣命京朝知縣者稱管勾廟事世安結銜爲西頭供奉官其稱管勾宜也若到任滿替之期自嘉祐六年四月至治平元年二月歷任尙少兩月蓋以就差已在庚子矣三年爲任其可推尋如是世安見王承衍傳子世安至崇儀副使通事舍人

韓愷墓誌銘

正書嘉祐七年十一月在安陽

誌載韓愷字和仲殿中丞公彥之次子嘉祐三年秋方應進士舉而兄確物故是冬其父病愷躬進藥劑晝夜侍側不解帶者累月及父之亡也哀毀過甚不能自抑旣而感疾遂不可治五年四月二十二日卒時年二十前列叔祖開府儀同三司行刑部尙書同中書門下平章事昭文館大學士監修國史上柱國儀國公琦撰并書宋史魏公本傳三年六月拜同中書門下平章事六年閏八月遷昭文館大學士監修國史封儀國公悉與此誌結銜同而開府儀同三司行刑部尙書史不及之魏公書結體純法魯公然以動業之隆掩其書名是固君子之所期不以小技累也

贈中書令韓國華神道碑

正書嘉祐八年十一月在安陽水冶鎮

碑前列推忠協謀同德守正佐理功臣樞密使特進檢校
太師行禮部尚書同中書門下平章事上柱國河南郡開
國公食邑六千八百戶食實封二千四百戶富弼撰宋史
宰輔表弼所授官與碑同本傳稱封祁國公進封鄭又進
封韓國公致仕其初封河南郡開國公史不及之又列翰
林學士兼侍讀學士朝散大夫尚書吏部郎中知制誥充
史館修撰判館事輕車都尉太原郡開國侯食邑一千八
百戶食實封二百戶賜紫金魚袋王珪書本傳于珪散官
勲爵亦從畧焉碑載國華歷官東都事畧國華見韓忠獻
傳但稱終右諫議大夫至宋史傳序官始備亦不著其監

上蔡稅又碑言爲京東轉運副使傳作轉運使碑載徙峽
路峽路之名見錢景謨傳安石欲令治峽路役書且委以
戎遽轡事蓋宋名川峽四路益州梓州利州夔州也而以
爲陝西路恐失其實碑後載公六男球湖州德清尉瑄將
作監主簿琚司封員外郎兩浙轉運使玠河陽司法叅軍
璩秘書省著作佐郎今丞相琦傳失載球璩宜據碑補其
闕

鍾宗直等題名

右題名正書字大五寸餘自左起凡七行行各六字文云
鍾宗直陳延孺晁升道息道虞道決道榮道王原甫以甲
辰九月來遊遂登絕口口生大澤瞰平口口觀覽之興甲

辰當爲英宗治平元年也案此題晁氏凡五人見具茨集有別息道二十二弟者兌之也和虞道二十三弟者豫之也決道念八弟得小金印以詩贈之者夫之也

畫錦堂記

正書歐陽修撰蔡襄書
治平二年三月在安陽

碑記韓公以武康之節來治於相乃作畫錦之堂於後園宋史本傳拜武康軍節度使久之求知相州東都事畧拜武康軍節度使知并州又知相州据是碑但稱自武康來治並無知并州之文故本傳削是不書也公出鎮凡三任鄉邦此初治相所建故記稱大丞相衛國公今集本有作魏者按傳載太后還政拜琦右僕射魏國公証之英宗紀治平元年五月戊申太后還政宰輔表於是年亦書閏五

月戊辰琦自門下侍郎兼兵部尚書同平章昭文館大學士兼修國史魏國公加尚書右僕射然則碑立於治平二年猶稱衛公與史不合殆由記文之作在治平初及立石已越歲集本俗刻不足依也

王巖叟北嶽題名

右題名正書文云魏國王巖叟沿檄之祠下治平乙巳中元乙巳英宗治平二年也案題稱沿檄之祠下蓋當時已有官守宋史本傳熙寧中韓琦留守北京辟管勾國子監又辟管安撫司機宜文字後知定州安喜縣韓魏公祠堂繪畫遺事記巖叟撰文云元豐末余爲邑於安喜以題名在治平當非知安喜時矣攷巖叟及第調樂城簿樂城與

曲陽近意其官主簿而沿檄至此與巖叟十八鄉舉省試
皆第一題名隱其官階不書識量宏且遠矣

史炤題名

右題名文云

缺

少卿史炤自

缺

路轉運使奉

缺

還朝恭謁

祠下治平三年十月二十三日題案宋有兩史炤通鑑釋
文左宜義郎眉山史炤見可撰者各位時代皆不類攷宋
史文彥博傳少與張昇高若訥從穎昌史炤學此題稱少
卿者當卽其人炤授徒得此謂盛矣炤又見河渠志興元
府山河堰灌漑甚廣人世傳爲漢蕭何所作嘉祐中提舉
常平史炤奏上堰法獲降勅書刻石堰上

王肅北嶽題名

右題名正書文云內殿崇班知縣事王肅供奉官焦世長
奉職祝令儀縣尉劉師目同來時治平丁未自左起向右
旁有小字亦自左起云清河崔希寂癸巳季夏十六日恭
謁靈祠宋史職官志內殿崇班爲武臣階今以加於知縣
事宋制文武皆得互借也志載西頭供奉官東頭供奉官
稱三班奉職今題惟署奉職及供奉官不言西頭東頭及
三班蓋略之不書

閭詢題名

右題名正書在華嶽碑頌之後文云諫議大夫閭詢還朝
恭謁金天帝戊申重陽日二子籍簡侍行宋史列傳詢字
議道神宗初轉右諫議大夫改邠同二州提舉上清太平

宮戊申爲神宗熙寧元年與傳言神宗初者合詢蓋于時還朝則以提舉優閒遂落職也傳言右諫議大夫未若題名自署諫議大夫者爲著其實

劉忱題名

題名正書在華嶽頌碑後下方自左起文云熙寧辛亥孟夏二十日提點刑獄尙書職方郎中劉忱之任蒲中恭謁祠下男唐工唐老唐純唐傑唐詢侍行宋史神宗紀熙寧七年三月丙辰遣遣林牙蕭裕來言河東疆界命太常少卿劉忱議之此題名卽其人

邵氏聞見錄熙寧七年春契丹遣使蕭禧來言代北對

境有侵地請遣使分畫神宗許之而難其人執政議遣太常少卿判三司開折司劉公忱爲使忱對便殿抗議以地不可棄執政罷忱爲三司鹽鐵判官較紀爲詳

忱亦見食貨志薛向領均輸

事乃請設置官屬神宗使自擇之向於是辟劉忱衛琪孫珪張穆之陳倩爲屬東都事畧劉煜傳子几知名忱爲監司郡守有聲忱子唐老見陳祐傳按賈易岑象求豐稷張耒黃庭堅龔原晁補之劉唐老李昭玘人才均可用東都事畧亦言忱子唐老元祐中爲右正言若提點刑獄而云之任蒲中地里志熙寧五年置官內有於永興軍提點刑獄於河中府置司然則蒲中提點刑獄司署所在也

潘孝知北嶽題名

右題名正書文云治平丁未授勅差知曲陽縣事是年九月十八日到任至熙寧庚戌孟冬初四日替歸闕下供奉官榮陽潘孝知謹記宋史職官志縣令任滿有政績則與

升擢乾道以後定以三年爲任此題所記丁未九月到任
庚戌孟冬替歸亦符三年之限然則三年爲任不沿於乾
道以後矣選舉志紹興五年有請令江淮官久任而課其
功過者帝曰朕昔爲元帥時見州縣官以三年爲任此其
徵也

修晉太尉嵇公廟碑

正書熙寧三年
八月在湯陰

廟記縣令張君楨修葺始末後列銜司徒兼侍中判大名
府兼北京留守司事大名府路安撫使魏國公韓琦記並
書宋史本傳熙寧元年七月復請相州以歸河北地震河
決徙判大名府充安撫使按之碑所司新兼北京留守司
事則略而不書也傳前神宗初詔判相州未蒞官遂改

判永興後熙寧改元請判相州故碑云余嘗兩守鄉邦蓋自紀其實

陳繹題名

右題名行書鑽空題在華嶽頌碑之中文云熙寧二年九月守彰化十一月移本路轉運副使制置解鹽使明年十一月移京東轉運使十二月三日過華陰河南陳繹題應體用科彥古進士彥恭彥成侍行馮翊保定二解元盧口趙豫同謁于金天祠下宋史繹本傳神宗立爲陝西轉運副使與題名合而制置解鹽使亦同在一時竟佚不見錄又爲京東轉運使史亦失載彥古彥恭彥成三人當是繹諸子彥古以應體用科入銜選舉志景德二年增置科目

有才識兼茂明于體用却掃編亦言景德中詔置制科內
有明于體用彥古所謂應體用科也錢少詹事跋延慶禪
院舍利塔記謂宋人由制科入等得官者甚多以應科繫
銜獨馬元穎一人案之此題陳彥古又其一矣

孫純題名

右題名正書在汝州淨因寺文云熙寧五年壬子歲春正
月詔舉秦王宮諸喪祔于臨汝脾山悼園之次以入內供
奉王修已爲監護又以入內供奉曹貽孫專治脾山之役
自三月辛卯始事至四月丁巳成功至五月壬寅送克襄
事時祇役與執事者凡九人都巡檢供脩使王懷誼提轄
從人管勾婦居內侍供奉張繼緒藍克寧監墳園供奉嚴

雍梁魯巡檢侍禁高德誠按頓遞殷直石繼道夏大卞梁
縣尉校書郎吳道發書汝州判官殿中丞孫純宋史魏悼
王傳真宗卽位追復秦王又咸平二年閏三月詔擇汝鄴
地改葬汝州梁縣之新豐鄉題名稱祔于悼園之次蓋由
此也廷美憂悸死于非命史旣歷著其歿後存恤之典至
其宮中諸喪祔塋賴詔旨爲之營護則文不具詳護王官
之喪使職亦設供脩頓遞而不見諸志文臨事更制事畢
卽停也又稱管勾孀居結銜他文亦不見

孫固題名

右題名正書在汝州淨因寺文云宋宗陳國公以熙寧六
年正月甲寅薨有詔塋于汝州梁縣秦悼王墳之次及舉

諸喪祔焉以龍圖閣直學士諫議大夫孫固西作坊使入
內副都知王昭明爲監護以入內供奉梁佐衛尉寺丞簽
書汝州判官劉唐憲專董塋兆之役自三月庚午經始迄
六月壬子遂克葬時與執事者凡十三人提舉諸司入內
供奉李憲專管勾諸司人內殿頭蔣良臣都巡內殿崇班
劉允和管轄墳園供奉嚴維梁魯縣巡檢供奉王翊按頓
供奉曹軫侍禁王士章冬官正楊茂先梁縣尉校書郎吳
道翰林書藝馬士明書宋史宗室諸王傳元傑改陳王無
子仁宗以恭憲王之孫允言子宗望爲之後宗望子仲卨
熙寧三年與商恭靖王孫宗肅等同日封陳國公官至陳
州觀察使卒諡良僖今題稱陳國公當卽其人也又王昭

諡案吳育傳自秦悼王薨汝州後子孫從葬皆出宦官
與護孫固傳稱固加龍圖閣直學士不載爲諫議大夫宰
輔表元豐元年書孫固自權知開封府樞密直學士右諫
議大夫除同知樞密院事于前熙寧六年不載爲諫議大
夫史從畧也李憲亦見宦者傳皇祐中補入內黃門稍遷
供奉官神宗卽位歷永興太原府路走馬承受數論邊事
合旨幹當後苑此題憲當熙寧六年猶爲供奉而傳書其
爲走馬承授卽于神宗卽位時當日得君之心何其驟也
翰林書藝職官志翰林院勾當官一員總天文書藝圖書
醫官四局是翰林有書藝局故當時用以結銜

祖無擇寇仲武題名

右題名正書在登封文云范陽祖無擇上谷寇仲武遊熙
寧癸丑孟春二日祖無擇宋史有傳云字擇之上蔡人此
題言范陽舉郡望也無擇當熙寧初爲安石中傷謫忠正
軍節度副使尋復光祿卿秘書監集賢院學士主管西京
御史臺此題癸丑爲熙寧之六年當安石見忌用王子韶
按治時亦漸遠矣天固使之投閒以佚其志耶

蔡延慶題名

右題名行書鑽空題名在華嶽頌碑之後文云治平丁未
夏領本路提點刑獄謁祠下後六年蒙恩除天章閣待制
秦鳳等路都轉運使過祠下謁金天帝宋熙寧六年癸丑
正月二十九日東萊蔡延慶仲遠題宋史列傳延慶提點

京東陝西刑獄與前題領本路提點刑獄合傳又云同修起居注直舍人院判流內詮拜天章閣待制秦鳳等路都轉運使亦與此題合

劉航題名

右題名正書題在後周華嶽領碑前一行字大徑寸餘文云河南監牧使劉航仲通提舉牧羊公事邱舜中聖徒同謁祠下熙寧癸丑仲秋十七日題航見兵志云自熙寧元年手詔議馬政後樞密院又言舊制以左右驤驥院總司國馬景德中始增置羣牧使副都監判官以領廐牧之政使領雖重未嘗躬自巡察不能周知牧畜利病以故馬不蕃息今宜分置官局專任責成乃詔河南北分置監牧使

以劉航崔台符爲之航又附見子安世傳以羣牧判官爲河南監牧使悉與題名合又兼牧羊公事案職方志稱鹽鐵分掌七案六曰騎案掌諸坊監院務飼養牛羊馬畜及市馬等則諸監宜有牧羊公事矣史文不備錄此可補闕

王紳題名

石題名正書在登封中嶽廟唐尉遲汾狀嵩高靈勝詩石刻之後文云余被詔禱雨於縣祠獲是石于圯墻之下遂移置壁間庶圖傳之永也熙寧丁巳季春日口侍大梁王紳丁巳爲神宗熙寧十年按紀是年三月不書遣使者分禱嶽廟之事旱未太甚故也紳被詔之來必不能以久淹而珍惜古刻至於移置妥帖如是其與世異趣者畧見是

矣

張叔卿題名

右題名正書在華嶽頌碑之後上方文云張叔卿被命之利路共謁祠下男試秘書省校書郎康伯待行熙寧十年三月十九日題元豐九域志宋史地理志並言利州路而叔卿惟言之利路省州字案吳昌裔傳利路轉運使曹彥約傳以爲利路轉運判官兼知利州高斯得傳授利路觀察推官邵伯溫傳除利路轉運副使見諸史文亦如此當時稱利路必有謂也

郝闢之題名

右題名正書文云汝南郝闢之希孟鄭圃周永年延之西

水陳知權仲與熙寧丙辰季春二十二日同遊超化寺案
嵩陽石刻題名內有稱淮西郝闢之者卽其人汝南舉古
郡名淮西舉路名其實一也神宗紀熙寧五年九月淮南
爲東西路至丙辰已當九年矣闢之所題從新制故也

淨因院主贊大師墓誌銘

正書在汝州元豐元年十二月

誌銘載師諱因贊字公禮俗姓張許州舞陽縣人嘉祐元
年遇乾元聖節恩許披剃乃落髮爲沙彌明年受具戒至

元豐元年皇祖河州相公喜師幹治之勤奏請于上賜紫
衣以勞之是年十一月十日感疾卒卽以十二月二日葬
師于院之西北隅其乞爲之銘者監墳奉職郎鄧思忠而
撰書是銘者則將仕郎前守魯山縣令魯公弼也宋史禮

志仁宗以四月十四日爲乾元節案聖節恩例在景德二年僧道已賜紫衣師號至仁宗朝又于僧徒恩許披剃史不具載也

慈林山法興寺新脩佛殿記

正書元豐四年正月在長子縣

碑列龍圖閣直學士太中大夫權判尙書吏部兼判昭文館太原郡侯王益柔記嵐州團鍊推官畢仲荀書并篆額益柔見宋史列傳書其歷官惟有判吏部流內銓及遷龍圖閣直學士與碑題銜符其太中大夫兼判昭文館太原郡侯皆失載記文稱法興寺始于後魏神口易新于唐之咸亨越宋建隆初僧凝誨諦構復完天聖中釋法信與麻衣從深又闢其基今主其事者則爲紹榮也佛殿旣成榮

以書來請而益柔感此寺爲其大父嘗所游息及其先子
誕育之地益柔父名曙字晦叔史有傳言其世居河汾後
爲河南人不著其隸長子攷邵氏見聞前錄云余爲長子
縣尉西寺中有王文康公祠其老僧爲余言文康公之父
邑人也以教授村童爲業有兒年七八歲不能養欲施寺
之祖師祖師善相謂曰兒相貴可令讀書因以錢幣資之
是謂文康公文康晦叔諡也此寺旣在長子文康之父爲
邑人遊息于此固也而晦叔降生之地非賴記所載莫由
知其迹矣然則邵氏所錄又証以益柔自記可以知其里
居之詳蓋于傳非小補也碑最後列朝議大夫知潞州軍
州事兼管內勸農使兼提舉澤州威勝軍屯駐泊就糧

兵馬巡檢公事輕車都尉太原縣開國男食邑三百
戶賜紫金魚袋王令圖立石令圖見河渠志云外監丞王
令圖獻議于北京又見趙瞻傳云都水王令圖請還河故
道

張舜民題名

右題名正書其文云元豐五年

缺

元祐二年自號還齋往

來皆拜嶽祠張舜民芸叟記石口攜往後二年歲乙亥自
關東再過東都事略張舜民元豐中朝廷方討西夏五路
出兵環慶帥高遵裕辟掌機宜文字遵裕敗謫監郴州酒
稅會赦得原元祐初宰相司馬光舉舜民才氣秀異剛立
敢言

云

逾年通判虢州提舉秦鳳路刑獄案此題元祐

二年卽東都事畧所謂元祐逾年也其云自就還幽尤與傳相符惟追記元豐五年之文已缺當指在靈武時以詩獲譴爾末又記後二年歲乙亥則爲紹聖改元之二年以宋史本傳攷之舜民後又加直秘閣陝西轉運使故云自關東再過其事略可推依如此

薛紹彭題名

右題名正書文云樂安薛紹彭富沙范勃元豐六年六月十六日宋史薛向傳子紹彭有文翰名按向本傳不著其占籍蓋以向爲顏孫顏已著籍河中萬泉矣而紹彭爲顏曾孫又自稱爲樂安當亦名其郡望也與揮塵後錄引蔡天啓作米元章墓碑云君與西蜀劉涇巨濟長安薛紹彭

道祖友善又著籍爲長安未知孰爲審也

韓跋北嶽題名

右題名正書自左起文云安陽韓跋元豐六年仲冬知成德軍棗城縣得替已嘗恭謁祠今復自祁之鼓城解官再遂瞻拜連治二邑皆獲善罷者荷陰祐之所賜也元祐二年十一月二十七日案元豐六年仲冬迄哲宗元祐二年十一月中間凡歷四年連治二邑蓋以二年爲任者攷宋史選舉志帝曰朕昔爲元帥時見州縣官以三年爲任猶且一年立威信二年守規矩三年則務收人心以爲去計今止以二年爲任雖有葺治之心亦無暇矣由高宗所諭則三年常制亦間以二年爲之然不知此題當元祐時已

有之矣

蔡延慶北岳題名

右題名正書文云龍圖閣直學士朝散大夫定州路安撫使馬步軍都總管兼知定州蔡延慶元豐八年正月九日甲辰奉詔致祀北岳是日恭款祠下齋戒丙午祭告建道塲癸丑禮畢還簽書節度判官王庠勾當公事杜天經堯勾機宜文字趙伋走馬承受公事陳嘉言勾當公事李仲從行下又有小字雙行題云通判州事侯臨續至癸丑致祭宋史列傳延慶復龍圖閣待制帥高陽閔歲復直學士移定武職官志定州則兼安撫使馬步軍都總管題銜所稱是也志載安撫使其屬有幹當公事主管機宜文字以

題名証之則爲勾當公事主管勾機宜文字史文避高宗
嫌名易勾爲幹又減管勾作主管耳王庠史有傳云字周
彥開戶窮經史百家傳注之學尋師千里究其旨歸元祐
中呂陶以賢良方正直言極諫科薦之庠以宋邦傑學成
未有薦者推使先就後賜號處士以卒是終身未嘗仕也
與此爲判官者蓋別爲一人

薛昌朝等西岳題名

右題名文云薛昌朝昌年昌諤范師軻同謁祠下元豐戊
午仲冬二十九日戊午元豐元年也昌朝見宋史李定傳
定爲崇政殿說書御史林旦薛昌朝言不宜以不孝之人
居勸講之地並論安石章六七上王安石傳亦載薛昌朝

論李定事昌諤見文潞公留題濟瀆廟詩石刻後題有婿
薛昌諤者當卽其人

薛侏題名

右題名正書文云中大夫致仕蒲津薛侏祭奠西嶽金天
帝元祐元年十一月十日記男宣德郎知華陰縣事兼兵
馬監押昌道孫太廟齋郎鈞鎬鉞鐸偕侍江隣幾雜志
薛侏比部待闕蒲中出協律郎蕭悅畫竹兩軸乃樂天作
者薛蓄畫頗多此兩畫尤佳也按題名云致仕蒲津而雜
志謂待闕蒲中意隣幾望其復起見用於世故以侏爲非
終沒退老如待闕者與富弼傳官吏島前資待缺寄居者皆賦以祿鄭穀傳令守臣體訪境內
寄居待闕及見任官觀京侏自題中大夫惟用散官列銜
朝官以上各具姓名以聞

蓋致仕不帶職事官今得雜志稱爲比部又知其爲刑部之屬也昌道稱宣德郎知華陰縣事兼兵馬監押職官志縣令若京朝幕官則爲知縣事有戍兵則兼兵馬都監或監押題名與志合志又稱致仕官員外郎已上致仕者錄其子試秘書省校書郎三丞已上爲太廟齋郎無子聽降等官其嫡孫若弟姪一薛倬有子昌道而孫復緣恩錄爲太廟齋郎固以昌道已有官階更推恩以及其孫與此宋制優老得盡其情如此故予不可以不詳也

郝宗臣北岳題名

右題名正書文云絳臺右通直郎知縣事郝宗臣自元祐二年十一月初九日到任至五年冬初八日終任汴都右

侍禁監廟權主簿張維周亦二年十月十九日到任至五年冬十八日終任凡三考之間幸獲風雨調順年歲豐登寇盜一空境內安枕居民樂業此荷嶽帝之垂祐也六年二月初二日謹記宋史選舉志凡考第之法內外選人周一歲爲一考欠日不得成考三考未替更周一歲書爲第四考此二題郝宗臣自元祐二年十一月初九日到任至五年冬初八日終任張維周亦自二年十一月十九日到任至五年冬十八日終任按其日數皆周歷三歲與欠日不得成考合乃嘆昔人題名之細謹其月日亦俾後世有稽也志又載倉庫盈羨寇盜剪滅部內清肅者本道轉運司各以名聞卽題名所紀年歲豐登寇盜一空之謂宋時

課績之制尤爲近古

杜純題名

右題名正書文云轉運使濮陽杜純挈家恭謁祠下元祐
戊辰閏月初七日男開奉命書宋史列傳純字孝錫濮州
甄城人元祐元年范純仁韓維王存孫永交薦之除河北
轉運判官召爲刑部員外郎大理少卿擢侍御史改右司
郎中尋知相州徙徐州陝西轉運使按題稱謁獄祠則爲
陝西時路經於此然元祐元年方蒙薦中隔一年至戊辰
爲元祐三年而敘遷之速如此任淵后山詩註据實錄元
祐二年九月知徐州杜純權陝西轉運使是二年爲誤也
兩司馬公題名

右題名八分書在夏縣禹廟文云且光乙丑四年三月七日來謁禹王祠題後有正書稱先太中河內公太史溫國公頃歲同謁夏禹祠太史公因留題於殿之西壁元祐己巳鄉人李權刻諸石乙丑爲神宗元豐八年後四年則哲宗元祐四年也且宋史本傳稱且與弟光友愛終始人無間言光居洛且居夏縣皆有園沼勝槩光歲一往省且且亦間至洛觀光司馬光傳亦云在洛時每往夏縣展墓必過其兄且此刻當爲溫公省兄時所題彥周詩話嵩山峻極中院法堂後柱間大字隸書曰且光願來蒞河內視弟至洛所記矣溫公書勁直聳峭得之尤足珍愛

韓魏公祠堂繪畫遺事記

正書元祐五年九月

碑記慶歷中魏公以資政殿學士帥定武大年乃得去去

後三十年民相與立祠于郡庠之西元豐末州之耆舊請

繪公遺事于祠堂之兩廡未暇成

民初爲魏公立祠在元豐元年韓絳自河東移

知定州民請于絳立廟見忠獻公祠堂記

越明年公之子忠彥出帥定定人喜

人曰吾家資政之子也因相與成之按文獻通攷慶歷八

年詔置河北四路安撫以韓琦王拱辰賈昌朝等充諸路

使碑言魏博鎮定並用儒帥是其事也忠彥本傳拜禮部

尙書以樞密直學士知定州與碑合碑前列左朝奉郎充

龍圖閣待制權知開封府兼畿內勸農使飛騎尉賜紫金

魚袋王巖叟傳左通直郎充集賢殿修撰提舉西京嵩山

崇福宮賜緋魚袋劉安世書左朝散郎試中書舍人賜紫

金魚袋韓川篆額三人宋史並有傳而嚴叟尤爲魏公門下客也嚴叟本傳止載權知開封府其階勲兼官悉不書惟却掃編載元祐六年王公嚴叟自左朝奉郎龍圖閣待制拜樞密直學士簽書樞密院事同此碑結銜則史失之畧矣安世本傳以集賢殿修撰提舉崇福宮與碑相証符而階亦未之及川本傳進爲侍御史樞密都承旨進中書舍人蓋至此始得實任不知其初爲試中書舍人也

京兆府新移石經記

正書元祐五年九月在西安府學

記爲京兆黎持撰河南安宜之書持自云承乏雍學當汲郡呂公龍圖領漕陝右之日案呂公卽大忠宋史有傳元祐初歷工部郎中陝西轉運副使知陝州以直龍圖閣知

秦州今記所稱興史符又云石經乃唐開成中鐫刻舊在
務本坊自天祐中韓建築新城而六經石本委棄于野至
朱梁時劉鄩守長安有幕吏尹玉羽者白鄩請輦入城鄩
方備岐軍之侵軼謂此非急玉羽給之曰一旦虜兵臨城
碎爲矢石亦足以助賊爲虐鄩然之乃遷置于此卽唐尙
書省之西隅也玉羽舊五代史有傳其護惜殘刻能委曲
全濟功亦鉅矣長安志朱雀街東第二街北當皇城南面
之安上門從北第一務本坊承天門街之東面第四橫街
之北從西第一尙書省刻者安民卽黨籍碑之不附名者
也

修邵陽縣學記

正書元祐八年
正月在邵陽

碑載籍田令王實仲弓求時彥序記實自爲書并題額者
文首稱邵陽令河內李百祿元祐辛未來蒞是邑首惟興
學爲士民勸其事跡略可見百祿字祐之爲時彥友人彥
見宋史列傳云彥字邦美開封人舉進士第歷官至吏部
尙書卒今碑題占籍乃云陽武與史小異史著其爲開封
人但以府名冠之豈如其自署之可徵與碑後有主簿張
价縣尉劉熙立石字

徐震北岳題名

石題名行書文云內侍殿頭徐震奉宣以南郊禮畢醮謝
安天元聖帝道場五晝夜管勾禮料節度推官張震提舉
排辦權縣事康聿巡檢王寧監務任紳監廟胡良輔縣尉

王岸曾與陪祠時元祐癸酉仲春日題案元祐癸酉爲
哲宗卽位之八年宋史哲宗本紀七年十一月辛卯朝獻
景靈宮壬辰饗太廟癸巳祀天地于圓邱此題所指南郊
禮畢卽其事也越歲始遣使醮謝嶽靈蓋典禮之序如此
韓南仲北嶽題名

右題名正書文云元祐八年五月遂城尉韓南仲沿檄之
北寨敬謁祠下宋史地理志真定府砦一北砦咸平二年
置南仲所之卽其地說文有柴字臣鉉等曰師行野次豎
散木爲區落名曰柴籬後人語訛轉入去聲又別作寨非
是題名稱寨已爲別體而志作砦亦轉木作石皆於文爲
舛凡吏越境而出依沿檄爲文李之才傳調孟州司法參

軍後雍謫安陸沿檄見之洛陽是也南仲奉檄亦猶此例也

游師雄題名

右題名正書其文云游師雄奉使關中祭禱祠下元祐口
年正月九日按張舜民撰游景叔墓誌銘元祐口年夏四
月吐蕃寇邊其酋長鬼章青宜結乘間脅屬羌結夏賊爲
亂謀分據熙河朝臣擇可使者與邊臣措置僉以公行公
以爲奉使絕塞兵謀軍勢間不容髮俟中覆則失於機會
欲如古者大夫出疆之事上允其請許以便宜從事此題
所云奉使關中其事正與史符

授堂金石文字續跋卷十終

受業博山賈六吉校

授堂金石文字續跋卷十一

假師武億虛谷著

男穆淳編

孫未重校刊

宋韓肖胄北岳題名

右題名正書文云安陽韓肖胄自定武之京師枉道恭謁
祠下紹聖三年七月初一日張誼偕行宋史列傳肖胄以
蔭補承務郎歷開封府司錄與府尹同對殿中徽宗問其
家世除衛尉少卿後歷除資政殿學士知紹興府亦在南
渡時矣但未審當紹聖三年于役定武爲何役攷韓忠彥
傳以觀文殿學士知真定府移定州在哲宗親政後疑肖
胄從侍於此時也

黃山谷書陰真君詩行書

詩刻存秋碧堂後有山谷自跋云忠州丰都山仙都觀朝
金殿西壁有天成四年人書陰真君詩三章余同年許少
章以爲眞漢人文章也案山谷所据天成四年人書予証
之抱朴子云近代漢末新野陰君合此太清丹得仙其人
本儒者有才思善著詩及丹經讚并序述初學道受師本
末列已所知識之得仙者四十餘人晉去漢未遠抱朴所
記深得其實詩內稱予得度世神丹之力蓋所云太清丹
也山谷爲此書當紹聖四年四月黔州禪月樓中趺然高
邁其亦有出世之思與

通利軍鐘款識

紹聖四年

鐘在孟縣城東門樓上馮魚山修志日拓其文以贈并記

鐘之形製爲說甚悉今節錄於篇其邑人相傳此鐘自修武浮河而來按古託所言古鐘或與山應或與龍關者不一雖未必可盡信然物之靈異亦有難以常理測者蓋縣距修武三百餘里以數千鈞之鐘無端在此亦自不可解耳至所云懷衛州通利軍者攷宋史地理志載滑州平川軍節度本通利軍天聖元年改通利爲安利四年以衛州衛縣隸軍熙寧三年廢爲縣隸衛州元祐元年復爲軍政和五年升爲州號濬川軍節度改今額云云按此則此軍初自通利改爲安利後旣廢而元祐年復爲軍者史似謂復爲安利軍而此鐘所云通利軍鑄鐘其歲爲紹聖丁丑蓋已在元祐後而仍用通利軍之名然則非復安利之名矣

蓋据此亦可補宋史之略又所云都巡檢者宋史職官志
縣巡檢連合處則置都巡檢以總之是也而大鑒小博士
之名不可曉或大鑒之義如工匠鑒造之類故其後卽列
匠人母郭氏耳予謂宋志以元祐元年後爲通利軍証之
金史地理志潯州宋大邳郡通利軍又改平川軍是宋後
改軍額以平川目之故宋志首注潯州平川軍節度是也
土人鑄造不因其新額仍卽本名通利呼之案河渠志于
政和五年下云湍激暴猛遇山稍隘往往泛溢近皆民夫
多被漂溺因以及通利軍又云八月己亥都水監言以大
河以就三山通流正在通利之東据此當政和二年己升
爲州此猶以通利軍名之且上之奏疏知當時可以通潯

也大監如監作監觀之屬蓋工師也然不稱大監而易作
鑒避與宦寺名相近豈其然與小博士爲匠役之稱宋時
茶酒肆諸傭保皆依博士爲名蓋此鄙習所襲已久予收
唐大歷六年同光禪師塔銘有造塔博士宋玉又得後唐
同光四年法華鈞大德塔銘有博士侯建鏞字造塔博士
郝溫以証此鐘識小博士爲工作無疑也至鐘自修武浮
河而來案五行志建炎三年吉州修城役夫得銅鑄棄水
中俄浮一鐘有銘三十六字蓋金失其性則爲變怪魚山
既啓其端仍以鄙聞推記于後如此

岑巖起題名

右題名在襄陽謝樸園手摹寄予文云郡太守岑巖起飲

錢前熙帥鍾弱翁于此吳周臣趙德麟魏道輔李方叔俱
至元符元年六月案直齋書錄解題德隅堂書品一卷李
薦方叔撰趙令時德麟官襄陽行棗中諸書方叔皆爲品
評之元符元年也此題德麟方叔俱至正方叔在德麟幕
時矣樸園容新野爲峴山之遊遍拓諸石記自爲校錄雅
興不減方叔予故略著其踪迹使後有攷也

韓宗厚墓誌銘

正書元符元年
九月在許州

誌載宗厚字敦夫祖諡忠憲考諱緯皇任尚書比部郎中
知解州贈右光祿大夫宋史韓億傳諡忠獻與誌文異億
有子八人緯亦不著其官階皆宜以誌爲據誌載宗厚歷
官蔭補太廟齋郎初任徐州沛縣主簿授上元縣主簿

光祿寺丞知温州永嘉縣簽書天平軍節度判官廳事後
又簽書鎮安軍充慶成軍使兼知河中府榮河縣及管内
勸農事驍騎尉賜緋魚袋卽誌所云四遷而至承議郎賜
六品服者也按中州金石記云宗厚不見於史予檢河渠
志熙寧八年七月江寧府上元縣主簿韓宗厚引水溉田
二千七百餘頃遷光祿寺丞証之誌稱宗厚授江寧府上
元縣主簿大興水利溉汙萊爲良田者至二千七百餘頃
創爲堰閘視時水旱而均節之民獲其利歌詠載涂丞相
王文公爲守上其狀於朝以勞應格特轉光祿寺丞卽指
其事是宗厚亦附見史文矣宗厚賜緋魚袋而稱六品服
職官志三品已上服紫五品已上服緋九品已上服綠据

此誌則六品已得服緋與史志不合蓋元豐新制也與服志元豐元年去青不用階官至四品服紫至六品服緋皆象笏佩魚中興仍元豐之制四品已上紫六品已上緋九品已上綠故宗厚卒於紹聖元年宜遵元豐改定章服而兩志未及對勘歸於一爾誌前列朝散郎前通判永興軍府兼管內勸農事兼陝西制置解鹽司勾當事上輕車都尉賜緋魚袋朱光裔撰光裔見鄂縣唐定慧禪師碑陰與王普題名又列朝請郎充集賢殿修撰知鄧州軍州兼管內勸農事兼京西南路安撫司公事上柱國賜紫金魚袋杜紘書哲宗紀載紹聖二年易集賢院學士爲集賢殿修撰撰紘結銜稱修撰與史合又紘本傳亦載加集賢殿修撰

其自知鄧州以下所兼官及勲服悉有所未及焉又列朝
請大夫管勾西京嵩山崇福宮上柱國賜紫金魚袋吳安
常兼蓋安常吳正肅公子見歐陽集贈吏部尚書吳公墓
誌銘

韓宗道墓誌銘

正寶元符二年
七月在許州

誌前列朝奉大夫充集賢殿修撰知泰州軍州兼管內勸
農事上輕車都尉曾盛撰朝請郎試中書舍人兼侍講上
輕車都尉賜紫金魚袋趙挺之書左朝議大夫竇文閣待
制知潁昌軍府事兼管內勸農使京西北路安撫使柱國
吳安持篆蓋盛與挺之宋史並有傳傳言肇降爲滁州稍
復集賢殿修撰歷泰州與銘題同而失載其勲爲上輕車

都尉挺之傳惟言召試館職爲秘閣校理而亦失載其試

中書舍人兼侍講上輕軍都尉安持附吳充傳云爲都水

使者遷工部侍郎終天章閣待制亦見禮志河渠志誌文

稱宗道字持正知制誥諱綜累贈太尉爲公之考綜傳又

稱子宗道歷官爲戶部侍郎寶文閣待制

傳文于帝曰朕有如綜者乎

下書子宗道爲戶部侍郎傳末又書子宗道至戶部侍郎寶文閣待制文重疊未刪并

其於他官治

行皆從畧予故依志文著之初以恩補將作監主簿三遷

大理評事監潁州商稅務代攝汝陰縣事嘉祐四年中進

士第知越州餘姚縣歷監在京皮角庫簽書彰德軍節度

判官事熙寧初知巴州擢成都府路轉運判官兼管勾常

平農田水利差役事入爲開封府判官復出提點河北西

路刑獄徙淮南路轉運副使兼提舉常平市易事八遷尚書工部郎中徙知廬州歷知鳳翔府潞州官制行召爲尚書戶部郎中使契丹還歷太常太僕少卿尚書左司郎中太府卿元祐三年擢權戶部侍郎真拜刑部侍郎未幾復爲戶部以寶文閣待制權知開封府復遷戶部五遷太中大夫紹聖初除寶文閣直學知成都府又以待制知陳州徙青州兼京東路安撫使徙瀛州兼高陽關路安撫使又徙杭州而銘題則稱通議大夫充寶文閣待制上柱國南陽郡開國侯食邑一千三百戶致仕當因徙杭州以後謝事也

自雲山主利師塔記

正禧元符二年
十月在鄆縣

記稱師諱得利字子益姓王氏京兆府高陵人天禧三年
屢蒙睿澤削髮受具宋時於聖節恩准度僧予嘗跋贊大
師誌銘已具言之矣記後稱師復詣鄉邑住毗沙隆昌寺
毗沙鎮名元豐九域志高陵有毗沙鎮是也又度小師一
人惠滿實慶歷三年乾元聖節試中經義者於是又見緇
流亦有所挾持而宋制之嚴不令其濫託也記文爲鄺時
趙宗輔撰講經律論席壇僧道雅書并題額書殊清脫不
凡

三十六峯賦

三十六峯賦石刻在登封縣少林寺蓋知登封縣四樓異
試可所作僧墨潛書于時當建中靖國元年九月昇宋史

有傳載爲進士高第但初歷官至卒皆不及知登封縣陳
師道面壁像記元祐二年留守簡翼張公求得面壁遺跡
後十有餘年知登封縣樓堦復往過之欲爲修治云並
可舉証益知史闕錄也墨潛卽參寥子與東坡倡和以詩
鳴者此賦所書尤得東坡之遺

太平州蕪湖縣新學記

行書

碑拓本失其下半文遂不全屬擇其可見者有云崇寧元
年仲秋天子思欲推廣神宗皇帝三舍造士之法詔下議
議司條具以聞本司奏言縣邑皆得以置學率閭里子弟
來就教育推步教條考察如法云
云宋史選舉志崇寧元
年宰臣請天下州縣並置學州置教授二員縣亦置小學

縣學生選攷升諸州學州學生每三年貢則附試別立號

太學則附

試別立號

考分三等入上等補上舍入中等補下等上舍入下等補
內舍餘居外舍碑所記卽其事撰記者禮部尙書黃裳案
直齋書錄解題濱山集六十卷端明殿學士延平黃裳見
仲撰元豐二年進士第一人貴顯于崇觀死于建炎書則
米老所書自署無爲守本傳稱芾以太常博士知無爲軍
蓋在崇寧三年是碑之立又當後於三年矣

勅賜靜應廟牒

正書在河內

牒載知河內縣事陳崇狀上清紫虛元君南嶽魏夫人廟
祈雨應驗乞賜廟額尋下太常寺看詳隨得賜靜應廟爲
額牒中兩勅字獨大六寸餘後題崇寧三年五月十五日

牒字又用陰文凸起皆他牒式所無又列左光祿大夫守
右丞吳下有押字宋史宰輔表崇寧三年九月吳居厚自
右光祿大夫尙書右丞加中書侍郎然牒下自五月載居
厚爲左光祿大夫守右丞表蓋于其時加官脫書也又列
司空兼左僕射下有押字表云三年五月蔡京自尙書左
僕射加司空正與符合末列大金承安四年五月紫陵故
醫生王口南激澤濟上石

王評題名

右題名正書自左起在唐紀功頌碑陰文云朝散大夫權
汜水縣事上柱國杜陵王評漢卿來觀崇寧四年六月二
十日題案西安府慈恩塔題名亦有王評自署承議郎新

通守清江郡事瑯琊王評漢卿奉使岐雍展先塋其時在
元祐三年至崇寧官益顯矣但慈恩題名稱瑯琊舉其郡
望而汜水題名稱杜陵以其先塋固在西安也或亦占籍
于此與

濟州金鄉學記

正書大觀
元年六月

記文列安定胡世將記隴西李浩書彭城劉暘題額三人
皆舉郡望不繫官階又各列名在文之末與他碑書撰書
者例頗小異宋史列傳世將字永公常州晉陵人宿之曾
孫登崇寧五年進士第李浩字德遠其先居建昌遷臨川
浩早有文稱紹興十二年進士是其人也最後結銜奉議
郎知縣事兼管勾宗室財用學事尹熙立石兼管勾宗室

財用學事以此入銜他刻未見案金鄉壤接南京此地蓋有宗室疎屬願居在外者于時亦當置宗學于此矣又考宋朝事實蔡京乞隨所在諸官置學添教授立法教養則教授主學事而以知縣事者管勾實爲史志所逸脫得此補之信而有徵也金鄉舊有夫子祠崇寧二年詔縣皆立學知縣事睢陽徐處仁卽其地而爲之明年濟南尹熙繼宰是邑而足其功蓋熙到官當崇寧三年甲申至大觀敗元越三年矣傳云處仁字擇之應天府穀熟縣人知濟州金鄉縣與題銜合書體勢深似率更宋刻本之佳類此者絕少故樂爲書之

張杲題名

大觀四年

右題名行書文云權發遣京西轉運使張杲被旨詣嵩山
崇福宮安掛御賜二門牌大觀庚寅十一月二十九日至
此杲宋史無傳惟王襄傳稱宣和六年起爲河南尹金人
再入出爲西道都總管張杲副之然則杲爲副總管當宣
和六年距大觀庚寅十有五年矣

席旦題名

政和二年

右題名正書攢空寫在唐華嶽精享昭應碑之前其文云
顯謨閣直學士席旦政和壬辰再守成都恭謁祠下二月
二十口日奎益從宋史本傳旦以顯謨閣直學士知成都
府徙鄭州黜知滁州久之帝思其治蜀功復知成都史不
著其年歲今以旦自題政和壬辰再守成都是爲政和六

年也又題奎益從本傳亦載子益字大光紹興初參知政事然則且有二子惟益附見奎不可考矣

元豐大觀詔書後序

正書

碑序前列銜宣德郎權發遣提舉京東西路學事借緋魚袋臣程振撰文云政和三年四月有詔許以元豐大觀詔書揭諸省臺寺監司守令治事之所以戒內外小大之臣各恭乃職毋相口紊於是臣孝純臣純誠既承命卽所司中門之東大書深刻藏以層構云末又題臣振實書之以申勸來者最末另行結銜朝議大夫權京東路轉運判官張孝純朝議大夫京東路計度轉運使兼勸農使借紫金魚袋臣沈純誠宋史程振列傳徽宗幸學以諸生右

職除官爲辟雍錄升博士遷太常博士提舉京東西路學
孝純見欽宗紀靖康元年三月知太原張孝純爲資政殿
太學士純訪見河渠志大觀三年八月詔沈純誠開撩免
源河免源是也却掃編舊制借服不佩魚故繫銜止稱借
紫借緋政和中王詔延康始建請借服皆佩魚如賜者從
之然差勅止仍舊云可特差某職任仍借緋或借紫而已
而其後繫銜者多自稱借紫金魚袋若借緋魚袋然終無
所據也以碑証之程振借緋而魚袋沈純誠借紫而金魚
袋並於政和三年時繫銜如此益信敦立掌故之徵爲實
張戴等題名

右題名正書在密縣文云留守薛公以右丞召還通判張

戴邢僚戶曹李敏能刑掾趙子泰送行至超化寺政和三年閏四月初九日薛公謂薛昂也宋史本傳出知江寧徙河南久之提舉嵩山崇福宮政和三年蔡京復用事昂復自尙書右丞爲左丞徽宗紀政和三年夏四月己酉以此資政殿學士薛昂爲尙書右丞此題稱留守當爲徙河南時也若徐處仁傳云以疾奉祠歸南都方臘爲亂處仁亟見留守薛昂爲畫戰守之策是昂前在南都所稱非此時矣又提舉崇福宮故得取道于宮而至超化寺一時情事猶可推見如此邢僚爲邢恕子附見恕本傳惟云及恕在時爲司農丞其爲河南通判未之及也

碑記云北都畿邑十三宗城舊治雒川避河之衝崇寧四年始遷邵固雖隸屬大名而經邇甘陵不過三十里學校之興縣之吏遵用崇寧二年詔書肇造宏麗以深邃爲他縣最縣在雒川村時有學元祐七年令郭長卿闢而新之今丞相何公實爲之記通直郎牛直侯洵仲爲是邑之二年以學雖已遷亦猶宗城之舊所秦坦載其興廢之由坦後題銜文林郎充恩州學教授陽翟者是也記云今丞相何公何執中也直侯題銜通直郎知大明府宗城縣管勾勸農公事專切管勾學事敎閱保甲某書并篆額宋史徽宗紀崇寧四年九月詔京畿三路保甲並於農隙時敎閱但以縣令敎閱保甲帶銜史未之及文獻通考載紹興九

年知建昌軍朱長民奏宣和以前准知通令佐階衙帶主管學事今題衙管勾學事是也書最峭健筆勢尤與東坡相近

陳彪題名

右題名行書文云左武大夫忠州國練使知東上閤門事提舉中太一宮兼祐神觀公事王郅子堅右武郎提點醴泉觀使陳彪炳文忠訓郎王淵深甫因隨侍見權節使太尉詣崇福得獲恭恭啓母殿下遂觀聖跡不勝大忭時政和戊戌孟夏十有八日彪謹題捧硯人劉天錫後又有小字正書題政和八年端午日靜正法師視朝散大夫知西京嵩山崇福宮事張若口太上都宮法錄弟子知廟事曹

如口節使太尉宋史徽宗紀政和七年春正月庚子以殿
前都指揮使高俅爲太尉職官志自崇寧五年司空左僕
射蔡京爲開府儀同三司安遠軍節度使中太乙宮使其
後殿帥則有高俅然則此題所稱節使太尉必高俅也居
錄載高俅出身不次遷拜數年間持節至使相此題視朝散大夫志又云宣和以
後官卑而職高者謂之視故有庶官視從官視執政執政
視宰相凡道官亦視文階云此當政和時道流亦視品官
蓋不在宣和以後至紀載重和元年詔視中大夫林靈素
視中奉大夫張虛白並特授本品真官則更授之正階正
員益以猥濫矣

趙德甫題名

右題名在泰山磨崖之東側正書文云天水趙明誠德
政和三年閏月江秬香拓贈紫金石錄後序云余建中辛
巳始歸趙氏時先君作禮部員外郎丞相時吏部侍郎侯
年二十一在太學作學生後二年出仕宦又屏居鄉里十
年攷建中辛巳是爲徽宗建中靖國元年德甫年二十一
至政和三年癸巳則三十有三矣此正屏居鄉里十年時
也

勅賜神居洞崇道廟額碑記

宣和元年三月

記載平陽府奏本府臨汾縣姑射山姑射洞離洞二十五
里有廟名姑射神人廟乞特賜名額奉勅賜姑射洞爲神
居姑射神人廟爲崇道其依牒奉行在政和八年閏九月

宋史地理志平陽府望平陽郡建雄軍節度本晉州政和六年升爲府此記以平陽爲府是也後列中大夫守右丞范中大夫守左丞馮徽宗紀重和元年以翰林學士承旨馮熙載爲尙書左丞刑部尙書范致虛爲尙書右丞又列少宰少保太師魯國公証之宰輔表余深自少宰加少保而太師魯國公則蔡京也後列宣和元年三月二十一日承務郎知臨汾縣事王伸立石朝奉郎知臨汾縣丞趙不鈞書

豐澤廟勅牒并記

宣和元年三月在濤縣

碑上載勅文行書有政和八年閏九月八日字後新書列有名銜拓本濕暈不可辨後行書奉勅如右牒到奉行政

和八年閏九月九日後載銜名太師魯國公京下注免書
二字左輔下注一闕字門下侍郎時中閏九月十日申時
都事李口冲右司員外郎權口口付吏太師魯國公京免
書太宰下注闕字少宰下有花押尙書左丞熙載尙書右
丞致虛後鈐尙書吏部告印印上書一押字後列典事李
敏員外郎口應書令史白宗禮名最後於印上書政和八
年閏九月十三日下宋時勅牒下行其式如是前門下侍
郎時中宰輔表九月庚寅白時中自中書侍郎遷門下侍
郎是也又左輔下注闕字徽宗紀改侍中爲左輔意此記
下勅之日左輔適闕人故不著也與太宰下注闕字表稱
七月鄭居中自太宰加少傅九月辛丑鄭居中罷起復蓋

於時閏月官猶未備人也少宰下書押字則表所書余深
自少宰加少保也下方記徐公禱雨得應抗章請賜封號
於是神錫爵康顯侯上列勅文卽謂此事其後題奉議郎
充濬州州學教授黃翰記并書奉議郎知濬州黎陽縣事
王兆立石後有朝請大夫通判濬州軍州同管勾神霄玉
清萬壽宮管勾學事謝朝請大夫通判濬州軍州管勾神
霄玉清萬壽宮管勾學事徐中奉大夫提舉三山天成橋
河等事賜紫金魚袋孟拱衡大夫永州防禦使直睿思殿
提舉三山天成橋河等事王四人皆姓而不名徽宗紀政
和六年改天寧萬壽觀爲神霄玉清萬壽宮此記所稱管
勾正與史合而禮志亦云政和六年詔措置宮觀如萬壽

醴泉近百員更不立額故此以一宮而管勾者二人則豈非濫也又志於宮觀不著管勾之名但有提舉提點及主管三職意者管勾卽主管之謂後因避諱易之與河渠志孟昌齡子揚揆俱監修三山天成橋而昌齡在宣和元年官已崇矣此稱中奉大夫者或爲其子揚與揆未可知也志言靖康元年詔揚揆與中奉大夫當因舊官復之

左山興化禪院普同塔記

行書宣和三年四月

普同塔記濟陰山人石芳撰并書其文云西堂管内僧正寶印大師賜紫茂基嘗建斯塔茂基俗姓江氏元符二年蒙天恩落髮受具戒崇寧元年皇弟定王奏賜紫方袍嗣領院事

云

案皇弟定王是爲神宗第十二子偲見宋史

徽宗紀卽位未改元之二月進封睦王偲爲定王是也石芳書深有東坡遺意宋佳刻也

邢恕題名

右題名正書字大三寸自左起不著年號惟書二月六日來觀邢恕和叔題上微偏有題云原武邢儔朝謁神霄像罷過天封得先公題字壁間不勝孺慕三川王堯文同遊宣和癸卯八月朔案儔云得先公題字卽謂恕也恕見宋史姦臣傳子居實儔居實有異材早卒儔及恕在時爲司農丞靖康初坐以始禍削籍大金國志趙倫燕人狡詐懼不得歸乃佯詐以情告伴使邢儔遂以聞史謂首禍指此不見有儔名攷齊東野語蔡京在相位日權勢甚盛內外官私公移皆避其名如京東京西並改爲

畿左畿右之類又蔡經國聞京閩音稱京爲經乃奏乞改名純臣竊意當時倂亦狗衆邀媚而易名曰倚迫京既敗乃復初耳然則倂之佞回幾及千年不能掩覆其跡如此予故著之以有諷也儔旣自署原武宋史載恕鄭州陽武人陽武不屬鄭州當依此題原武爲正

改修孟州門頌詔廳碑

正書宣和六年三月在孟縣

碑分三層上層宜和御筆並依所奏施行六字中層載元紹直狀奏移修門廳始末文多漫漶不屬惟云臣伏觀徽猷閣直學士正奉大夫王序前過河陽又云安撫使王序下層載紹直跋記尙可辨識略云宣和五年冬十二月癸卯臣以孟州頌詔廳改建具其事上達粵十八日有旨賜

可臣恭奉宸翰卽日命工更改又六十日而成有司礱石有請曰凡郡之奏疏被上之親筆而下者皆刻之金石以垂示天下口敬承故事臣謹按口三城在河之陽控扼諸道襟帶河山故自列朝號爲巨屏先後來者皆名公卿云

末題中散大夫權知河陽軍州口管勾神霄玉清萬壽宮兼管內勸農使口口口提舉黃河埽岸口口口馬事河南縣開國男食邑三百戶借紫金魚袋臣元紹直謹記却掃編凡曰節鎮皆曰某軍某軍而孟州曰河陽三城襄陽府曰山南太原府曰河東鳳翔府曰鳳翔揚州曰淮南江陵府曰荆南成都府曰劍南西川潼川府曰劍南東川興元府曰山南西道總九州府獨因舊以爲名亦出於偶

然本不以地望有所輕重然凡建節者反以是數州爲重
非親王尊屬與勳望重臣莫或得之故記以三城列朝號
爲巨屏者此也紹直史無所徵然修舉廢墜不事因循遠
於庸猥者多矣序附見兄庠傳內云序宣和間以恩倖至
徽猷閣直學士是也亦見河渠志政和七年九月丁未詔
楊專一措置而令河陽守臣王序營辦錢糧督其工料此
後載前河陽守臣正與相符

西嶽題名

右題名殘缺今文字可紀者有云二十三日自知永興軍
府事奉詔乘傳歸闕將長子太子中舍益恭右侍禁益昌
長孫太常寺奉口郎慎言祗謁鑒字案此當爲王曙所記

也宋史列傳曙徙河南府永興軍召爲御史中丞兼理檢
使與題名知永興軍府合奉詔歸闕卽召爲御史中丞也
傳惟言曙子益恭益柔恭字達夫以蔭爲衛尉寺丞終父
喪遂以尙書司門員外郎致仕題名云長子益恭者卽其人而
益昌亦爲其子史因以其微無可紀也長孫慎言邵氏聞
見前錄載曙孫慎言慎行慎術俱列大夫皆賢從康節先
生交遊又耆英會亦列朝議大夫王慎言名

杜詵等題名

右題名行書無年月自左起文云奉禮郎杜詵光祿主簿
蘇舜欽將作主簿司馬旦京兆掌書記趙訥京兆戶曹張
復太廟缺詵見歐陽集杜祁公墓誌銘云子男曰詵大理

評事當卽其人宋史列傳稱辭欽以父任補太廟齋郎調
滎陽縣尉尋舉進士改光祿寺主簿知長垣縣與此題合
東都事略復舉進士稍遷大理寺丞不及其爲光祿寺主簿司馬旦傳歷官十七遷至
大中大夫不言爲將作主簿蓋史略也又大中大夫史亦
涉誤証以夏禹祠題名云先太中河內公正指伯康則宜
從太爲是

游師雄墓誌銘

正書

墓誌首列朝請郎直秘閣知潭州軍州兼管內勸農事兼
荆湖南路安撫充本路兵馬鈐轄驍騎尉賜紫金魚袋張
舜民撰朝散大夫直龍圖閣權知秦州軍州兼管內勸農
事兼權發遣秦鳳路經略安撫使兼馬步軍都總管公事

騎都尉賜紫金魚袋邵饒書端明殿學士中散大夫充涇
原路經略安撫使馬步軍都總管兼知渭州軍州事管內
勸農使上柱國賜紫金魚袋章棗篆蓋舜民與棗宋史並
有傳而敘舜民不載其兼官敘棗不載其歷階又詔文載
師雄陞潁州團練推官陞忠武節度推官改宣德郎遷奉
議郎賜緋遷承議郎加武騎尉改工部員外郎知秦州兼
權秦鳳路經略安撫使兼馬步軍都總管加飛騎尉傳皆
未之及叔卿幹略爲當時所倚而未竟其材傳旣約用此
志爲文不宜敘其歷官過簡使益有失實之憾也予爲補
之如此

無盡藏岩跋

正書

跋刻爲衡陽羅當世用之所撰書其文云臨武縣南十有五里之外有巖焉溪山美麗竇穴明澈誠一邑山水之巨擘舊名奔頭邑宰王公易爲秀巖竇慶丁亥中春武夷趙公率僚屬勞農于郊因過是岩指點勝槩拂拭舊題顧謂衆曰以秀命名美則美矣恐未足以盡其實欲以無盡藏名之可乎于是遂書諸石宋史地里志桂陽軍南渡後增縣一臨武中有石晉廢紹興十年復此跋所記是也有字下當有脫文此條宜移在淳熙後蓋上版誤

封靈峻昭應博濟永利公勅

行書乾道戊子季春

石刻上層鐫勅文署乾道二年十月五日後題尚書左僕射平章事口尙書右僕射同中書門下平章事杞叅知政

事節同知樞密院兼權叅知政事俊卿以宰相表攷之爲
葉口魏杞蔣芾陳俊卿也四人皆名而不氏後列右承議
充秘閣修撰前四川安撫制置使同叅口口兼提舉四川
綱馬口路舟船驛程賜紫金魚袋吳口立石名已殘蝕不
可辨四川之名由咸平四年三月辛巳分川峽轉運使爲
益利梓夔四路後乃相沿謂四川矣

見宋史
真宗紀

儀制令石刻

淳熙
八年

石刻在略陽中行題儀制令三大字徑三寸餘下題字寸
餘文云賤避貴少避長輕避重去避來後題淳熙辛丑邑
令王口立石而名損缺不可見辛丑度宗之八年也東都
事略太宗紀太平興國八年正月甲申詔曰傳云能以禮

讓爲國乎何有宜令開封府及諸州於衝要處設榜刻饒制令論如律宋史孔承恭傳嘗上疏請令州縣長吏詢訪耆老求知民間疾苦吏治得失及舉令賤避貴少避長輕避重去避來請詔京兆並諸州於要害處設木牌刻其字違者論如律上皆爲行之然則此令爲宋律舊文起於上旨榜之要衢固當宋初已有此制然當時未刻於石也癸辛雜誌載律云去避來之文太宗嘗問孔承恭曰令文宗貴賤長輕各有相避何必又云去避來此義安在承恭曰此必戒於去來者互相避耳蓋承恭又承上問爲申律意如此但如宗貴賤長輕於義不相屬皆傳刻脫訛之過非周氏故書也此刻得之趙渭川及他宋刻善本足爲關中

金石記補遺予故喜而跋之

文丞相題琴背詩

行書

琴背題詩藏福建口縣何氏家大興朱先生拓兩紙予得其一云松風一榻雨瀟瀟萬里封疆不寂寥獨坐瑤琴遺世慮君恩猶恐壯懷消時景炎元年蒙恩遣間召入夜宿青原寺感懷之作譜於琴中識之末題文山二字按指南前後錄及別錄並未載此詩攷宋史少帝紀德祐二年五月乙未朔宜中等乃立昱於福州以爲宋主改元景炎文天祥自鎮江亡歸庚辰以爲右丞相兼知樞密院事文山本傳汎海至温州聞益王未立乃上表勸進以觀文殿學士侍讀召至福拜右丞相紀年錄四月八日至温州五月

明景炎皇帝於福安登極改元以觀文殿學士侍讀召赴
行在今題稱蒙恩遣問召入正其時也丞相身柱朱社瀕
危彌厲得此詩益足以想見所懷

偽齊

孟邦雄墓誌銘

孟邦雄誌石前已跋尾在偃師金石遺文記內後覽熊克
中興小紀云紹興二年夏四月時劉豫欲遷居東京而忠
護軍翟興屯伊陽山以阻其路豫每遣人往陝西則假道
于金由懷衛太行取蒲津濟河以達誌所指西京北路安
撫總管翟興阻兵負險隔絕道路卽其事也誌又載正月
西賊叛逆順商號三州相繼變亂虜掠百姓攻圍城邑大

兵未集遽入西洛按中興小紀知虢州董震初嘗從僞至是復歸正乃將所部與琮并力襲取西京大金國志天會十一年春西京留守孟邦雄爲宋翟琮所敗琮卽翟興子時爲河南鎮撫憤大金發掘陵寢琮及董震以小寨餘衆入潼關邦雄醉方卧俘其族以去

潼關字疑誤

然則西賊謂董

震也震知虢州在洛陽之西故也又翟琮引衆擣孟邦雄營邦雄方醉臥遂將其族以歸與誌載被執相符而誌旣云邦雄被害又父恩被傷致殞男安世同日被禍則俱戮死于西京故邦雄得塋永安軍蘇村之原也而熊氏謂詔琮押邦雄赴行在當日蓋未成行矣陳振孫書錄解題以熊克爲是書往往疎畧多抵牾其有指于此也與

華裔圖

華裔圖碑阜昌七年十月朔岐學上石其略云四方蕃夷之地賈魏公圖所載凡數百國今取其著聞者存之又參攷傳記以敘其盛衰本末蓋撰者自著其例如是所云魏公謂賈耽也舊唐書本傳耽令工人畫海內華夷圖一軸廣三丈縱三丈三尺率以一寸折成百里今此圖所載皆朱制京府州軍之名取賈舊製變爲縮本最易展開閻伯詩著潛邱劄記地圖見者元道士朱思本輿圖蓋其平生之志而十年之力不知此圖又前于元矣伯詩引新唐書謂以寸爲百里表獻于上曰縮四極于纖縞分百郡于作績宇宙雖廣舒之不盈庭舟車所通覽之咸在目此表載

舊唐書耿本傳今誤連于新書下伯詩必不疎莽至此校錄者誤也偽齊僭立亦有四京之目此圖稱河南不言西京或由翟琮復西京已不屬之偽齊與